

FJALA E DEPUTETES GRETA BARDELI

E ENJTE 24 NËNTOR 2022

Në datën 20 nëntor 2022, ndërsa KESH-i blinte në tregun ndërkombëtar me çmim të lartë, hidrocentralet në territorin e qarkut të Shkodrës filluan hapjen e portave dhe shkarkimin e pakontrolluar të ujërave të hidrocentralit të Vaut të Dejës. Kjo mund të verifikohet lehtësisht, pasi të gjitha banesat dhe sipërfaqet e mbuluara nga uji ndodhen në afërsi të Drinit, i cili, për shkak të shkarkimeve, përmbysi dhunshëm zonën e Bërdicës së Mesme, Kuçin, lagjet nr. 1 dhe nr.4, si dhe lagjen Ajasëm të qytetit.

Rreziku fillestar i shkarkimeve do të kishte qenë me pasojë shumë herë më të mëdha, por për fat të banorëve të Shkodrës, kuotat e liqenit të Shkodrës kanë qenë në nivel jo të lartë, gjë, e cila ka bërë të mundur zbutjen e pasojave të shkarkimit të asaj dite. Në fakt, për t'u marrë në konsideratë është edhe dëmtimi i urës së vjetër të Baçallëkut nga furia e shkarkimet të ujërave nga hidrocentrali, që rrezikoi edhe të vetmen urë aktuale në hyrje të qytetit, që është në gjendje të mjerueshme.

Pasojat e përmbytjes, përveç vështirësive që u krijuan banorëve, kanë sjellë dëme të konsiderueshme në banesa, në biznese, në bazë materiale, në toka bujqësore dhe në bazë ushqimore për blegtorinë. Përmbytjet e vazhdueshme në territorin e Shkodrës kanë dekurajuar fermerët e këtyre zonave për zhvillimin e bujqësisë, me pasojë jo vetëm rënien e prodhimit bujqësor, por edhe largimin e banorëve për të gjetur mundësi të tjera jetese, shumica jashtë vendit.

Ndaj, me qëllim përballimin e faturës financiare për dëmshpërblimin e dëmeve të shkaktuara nga përmbytja e papritur, si pasojë e hapjes së portave shkarkuese, ne propozojmë alokimin e një fondi prej 2 miliardë lekësh në buxhetin e vitit 2023, konkretisht: fondi prej 2 miliardë lekësh për mbështetjen e sektorit energjetik të përdoret për të përballuar kostot e dëmshpërblimit të dëmeve të shkaktuara nga përmbytjet në qarkun e Shkodrës dhe të Lezhës, sipas përcaktimeve në vendimin e Këshillit të Ministrave.